

ATTAVIITSOQ

INATSIARTUNI

UKA2023/20

05-10-2023

Knud Mathiassen

Nioqqutissanik eqqussunermi akitsuutit pillugit Inatsisartut inatsisaata allanngortinneqarneranik Inatsisartut inatsisaat (puulukit nersutaatillu neqaasa akitsuutaannik atorunnaarsitsineq amma Nioqqutissanik eqqussuineq annissuinerlu pillugit Inatsisartut inatsisaata allannguutaasa malitsigisaannik allannguinerit).

Aningaasaqarnermut, Naligiissitaanermut, Aatsitassanut, Inatsisillu atuutsinneqarnerannut Naalakkersuisoq.

Nioqqutissanik eqqussunermi akitsuutit pillugit Inatsisartut inatsisaata allanngortinneqarneranik Inatsisartut inatsisaat, puulukit nersutaatillu neqaasa akitsuutaannik atorunnaarsitsineq amma Nioqqutissanik eqqussuineq annissuinerlu pillugit Inatsisartut inatsisaata allannguutaasa malitsigisaannik allannguinerit pillugit siunnersuut imaattumik oqaaseqarfigissavara:

Aallarniutigalugu oqaatigissavara assorujussuaq pakatsissutigigakku suliap tusarniutigineqarnerani susassaqtut uunga suliamut pingaarnepaajunasorisakka, tassa nunatsinni Sulisitsisut (GE), Aalisarnermut Piniarnermullu pisortaqarfik, minnerunngitsumillu Kommune Kujalleq siunnersuummut oqaaseqaateqarsimangimmata. Uffalu massa nunatsinni savat neqaannik tunisassiorneq ukiorpassuarni annerusumik iluanaaruteqarfiunngitsumik ingerlanneqartoq naluneqanngereersoq.

Aamma tupinnarluinnarpoq Naalakkersuisut iluamik eqqarsarluaqqaaratik nunatsinni namminerisamik tunisassiatsinnut, tassa kalaallinut kalaaliminernik pinngitsuuisinnaangitsunut sunniuteqapilussinnaasumik iliuseqalermata.

Tassami puulukit nersutaatillu neqaasa akitsuutaannik atorunnaarsitsivinnissaq nunatta karsiata isertitassaasa 13,3 mio. kr.- nik ikilinissaannik kinguneqassangatinneqartoq naatsorsuutigineqarmat. Eqqarsaatigineqarsimangilarluunniit kalaaleqativut pingaartumik utoqqaat ukiorpassuarni oqaluttuaraluartut kalaalimernit akisuallaaqimmata akissaqartinnginnamikkitt qallunaamerngit akikinnersiungaralugit pisiariinnartariaqartarlugit, uffa kalaaliminertorusunnerungaaraluarlutik.

ATTAVIITSOQ INATSIARTUNI

Aamma eqqaamaneqartariaqarpoq kalaaleqativut danmark-imiittut, minnerunngitsumik peqqissartut aamma ukiorpassuarni noqqaajuaraluarlutik iluamilluunniit kalaaliminertortinneqarneq ajortut, naak timip sungiusimasaanik peqqinnartunillu atorfissaqartitsingaluartut isiginiarneqanngillat, tamanna akuerineqarsinnaananilu illersorneqarsinnaanngilaq.

Maani partiinik Namminiilivikkusuttunik qujanartumik ilaqarpugut, kisianni kalaallit tunisassiaavut nioqqutissanik avataaniit tikisittakkatsinnik sakkortuumik unammillerneqartuassappata, sumiissava nammineersinnaanerunermik isuma?

Eqqarsaatigillualaarniarsiuk; maannaasiit kalaalimerngit puulukimernut qallunaallu neqaataannut ajorsartinneqaqqittussanngorput, naak kalaalerpasuit aamma oqareennittut pingaartumik napparsimasut Danmarkimut peqqissariarsimasut utoqqartavullu kalaaliminertornerungaaraluartut.

Isumaqarluinnarpunga landskarsip annaasassai 13,3mio. kr.-init attatiinneqartuuppata, taakku kalaalimernit akikinnerulersinnaqarnerannut, Danmarkimilu Kalaallit peqqissartut kalaaliminertornerulersinneqarsinnaanerannut atorluarneqarsinnaasut.

Naggaataatigut partiit tamaasa kaammattorusuppakka landskarsip annaasassaralui 13,3mio. kr.-it puulukit qallunaallu neqaataasa akitsuuteqartinnerisa attatiinneqarnerisigut, kalaalimernit akikinnerulersinneqarnissaannut suliniut aallartinneqassasoq ammaa kalaallit danmarkimi peqqissartut kalaaliminertortinneqarnerunissaannik suliniut aallartinneqassasoq.

Taama naatsumik oqaaseqarlunga suliap aappassaaneraneqannginnerani ataatsimiititaliamut susassaqtumut sukumiisumik oqaluserineqarnissaa inassutigaa.